



Indgået

20 FEB. 2017

Inatsisartuni ilaasortaq Michael Rosing  
Inatsisartut  
/Maani

NAMMINERSORLUTIK OQARTUSSAT  
GRØNLANDS SELVSTYRE  
INATSISARTUT ALLATTOQARFIAT  
BUREAU FOR INATSISARTUT  
BOX 1060 - 3900 NUUK

Inunnut paasissutissanik suliarinnittarneq pillugu inatsit aamma valg.gl-imi  
qinersinissamut ilisimatitsissutit pillugit § 37 naapertorlugu apeqqummut nr. 2017-070-  
imut akissuteqaat

Brevdato: 16-02-2017  
Sagsnr.: 2017-3019  
Dok. nr. 17128808

Asasara Michael Rosing,

Postboks 909  
3900 Nuuk

Inunnut paasissutissanik suliarinnittarneq pillugu inatsit aamma valg.gl-imi qinersinissa-  
mut ilisimatitsissutit pillugit Inatsisartut suleriaasianni § 37 naapertorlugu apeqquteqar-  
putit. Apeqqutitit uannut akisassanngorlugit innersuunneqarput.

Tlf.: (+299) 34 50 00  
E-mail: box909@nanaoq.gl  
www.naalakkersuisut.gl

#### Apeqqut 1.

**Naalakkersuisut isumaqarpat nittartakkami valg.gl-mi tamanut paasissutissiissutigi-  
neqartut naammattumik ilisarnarunnaarsagaasut Inunnut paasissutissanik suliarin-  
nittarneq pillugu inatsit unioqqutinneqarsinnaajunnaarlugu?**

Akissut:

Kommunalbestyrelsinut, Inatsisartunut Folketingimullu qinersinerni isertuussisoqartar-  
poq, qinersinerni qinersisut aterminnik isertuussillutik taasisinnaanissaat isumagineqar-  
tarmat. Isertuussillutik qinersinissap qulakkeerneqarnissaanut iliuusissat aalajangersi-  
masut qinersisarnermut inatsisini attuumassutilinni allassimapput. Assersuutigalugu  
kommunalbestyrelsinut, nunaqarfinni aqutsisunut ilagiillu sinniisaannut qinersisarnerit  
pillugit Inatsisartut inatsisaanni § 30, imm. 4 Inatsisartut inatsisaanni nr. 27 28.  
november 2016-imersoq innersuussutigineqarsinnaavoq:

" Taasineq pissaaq ineeqqami taasivimmi allamik inoqartussaangitsumi. Qinersisartup pappiaq-  
qami taasivissaq immersussavaa qinigassanngortittup partiilluunniit taarusutami nalaatigut taasil-  
luni krydsiliissalluni. Taasiviit pappiaqqat krydsiligassat atorneqanngippata qinigassanngortittup i-  
maluunniit partiip kommunalbestyrelsimut qinigaatinniakkap aqqata allanneratigut taasisoqas-  
saaq. Taava qinersisartup pappiaq taasivik peqissavaa, kina taasimanerini allanit takuneqarsin-  
naajunnaarlugu. Qinersisartoq taamaalioreeruni pappiaq taasivik peqitaq karsimut nakkartitsi-  
vimmut ikissavaa pissutissaqanngitsumillu uninnganani inimit qinersivimmit qimagutissalluni."

Aamma qinersivinni minnerni iliuusissat taakku isertuussamik taasinissap qulakkeerni-  
saanut naammassorinarput. Assersuutigalugu 2013-imi kommunimi qinersinermi Qassi-  
miuni, taamanikkut 22-nik innuttaqarluni nunaqarfinni minnersaasumi qinigassanngortit-  
tunut arfineq pingasunut, partiinit assigiinngitsunit pingasuneersunut taasisut aqqaniliup-  
put. Tassani qinersisartut ataasiakkaat kikkunnik qinersisimanersut paasineqarsinnaan-  
ngilaq.

Taamaattumik qinersinernit taakkunannga paasissutissat nalinginnaasutut ilisarnarunnaarsagaasutullu nalinginnaasumik isigineqarsinnaapput.

Kisiannili inunnut paasissutissanik suliarinnittarneq pillugu inatsit inunnut paasissutissanut tunngasuvoq, tassalu paasissutissat inummut pineqartumut kinaassusersinissamut kinaassusersineqarsinnaasumulluunniit paasissutissat suulluunniit tassani pineqarput, tak. inunnut paasissutissanik suliarinnittarneq pillugu inatsimmi § 1, imm. 1 aamma § 3, nr. 1<sup>1</sup>.

Tamanna tunngavigalugu Naalakkersuisut isumaqarput, paasissutissat nittartakkami valg.gl-imi tamanut saqqummersinneqartut kinaassutsit ilisarineqarsinnaannginnerat naammalluni, inuit pillugit paasissutissanut inatsimmik unioqqutitsiviunngitsut. Taamaattoq Naalakkersuisut ajornartorsiut pillugu Datatilsynimit oqaaseqaammik piaartumik pinialersaarput.

## **Apeqqu 2.**

**Taamaangippat; Naalakkersuisut pilersaarutiginerlugu tamanut paasissutissiisutiginartut naammattumik ilisarnarunnaarsagaanissaat?**

Akissut:

Apeqqu 1-imut akissut innersuussutigineqarpoq.

Ikinngutinnersumik inuulluaqqusillunga



Mute B. Egede

---

<sup>1</sup> Inunnut paasissutissanik suliarinnittarneq pillugu inatsisip Kalaallit Nunaannut atuuttussanngortinneqarnissaa pillugu peqqussut nr. 1238, 14. oktober 2016-imeersoq.